

SOALAN NO: 164**PARLIMEN MALAYSIA****PEMBERITAHU PERTANYAAN DEWAN RAKYAT**

PERTANYAAN : Bertulis

**DARIPADA : Dato' Fauzi Bin Abdul Rahman
[Indera Mahkota]**

**SOALAN : Dato' Fauzi Bin Abdul Rahman minta
MENTERI PERTANIAN DAN INDUSTRI
ASAS TANI menyatakan:-**

kesediaan Kementerian membantu nelayan-nelayan dengan membekalkan bot-bot pukot tunda dan sekaligus melatih mereka ke lautan dalam bagi menentukan hasil tangkapan yang lebih baik dan terjamin memandangkan nelayan-nelayan negara kita selalu tewas dengan nelayan-nelayan luar negara yang memiliki pukot tunda yang lebih besar dan lebih canggih.

JAWAPAN

Tuan Yang Dipertua,

Kementerian Pertanian dan Industri Asas Tani melalui Jabatan Perikanan Malaysia tidak menyediakan bantuan khusus dalam membekalkan bot-bot pukat tunda kepada nelayan. Walau bagaimanapun, pemilik vesel boleh memohon insentif melalui pengecualian cukai berdasarkan kepada syarat-syarat yang ditetapkan oleh Jawatankuasa Penilaian Insentif Sektor Pertanian. Untuk makluman Yang Berhormat juga, Kementerian ini sedang melaksanakan dasar penghapusan pukat tunda zon B menjelang tahun 2020.

Dalam pada itu, Kementerian ini melalui Jabatan Perikanan Malaysia juga menyediakan kursus peralatan menangkap ikan dan bantuan pelayaran di Akademi Perikanan Malaysia dalam usaha untuk meningkatkan kemahiran nelayan tempatan. Selain itu, Program Sijil Kemahiran Malaysia Teknologi Perikanan Tangkapan turut disediakan bagi melahirkan tenaga kerja mahir dalam bidang perikanan.

SOALAN (165)

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : BUKAN LISAN

DARIPADA : YB. DATO' FAUZI BIN ABDUL RAHMAN
[INDERA MAHKOTA]

SOALAN :-

YB. Dato' Fauzi Bin Abdul Rahman [Indera Mahkota] minta MENTERI KESEJAHTERAAN BANDAR, PERUMAHAN DAN KERAJAAN TEMPATAN menyatakan kesediaan Kementerian mengkaji untuk membina semula rumah-rumah kos rendah generasi lama yang hanya memiliki 2 bilik dan satu bilik air serta ruang lantai sekitar 600 kaki persegi kepada yang lebih selesa, seperti 3 bilik dan dua bilik air serta ruang lantai melebihi 1,000 kaki persegi. Cadangan ini dibuat berdasarkan kawasan-kawasan perumahan kos rendah sekarang terletak di kedudukan strategik dan berada di kawasan tanah yang nilainya jauh meningkat.

JAWAPAN :-

Tuan Yang di-Pertua,

Untuk makluman Ahli Yang Berhormat, penjanaaan semula perumahan awam bagi tujuan meningkatkan daya huni unit perumahan awam adalah sebahagian daripada agenda Kementerian Kesejahteraan Bandar Perumahan dan Kerajaan Tempatan (KPKT) melalui Jabatan Perumahan Negara (JPN). Perkara ini menjadi fokus JPN disepanjang pelaksanaan pembangunan perumahan berteraskan Dasar Perumahan Negara (DRN 1.0) dan akan terus diperhalusi semasa menyediakan DRN 2018 - 2022.

Untuk makluman Ahli Yang Berhormat, Kementerian tiada perancangan untuk membangunkan semula projek-projek PPR sedia ada dan Walau bagaimanapun, beberapa penambahbaikan telah dibuat seperti berikut:

- (i) Kementerian tidak lagi membina rumah yang boleh membebaskan penghuni seperti pangsa lima tingkat dengan

- memberi fokus kepada rumah berbilang tingkat dengan kemudahan lif atau jenis atas tanah (*landed*);
- (ii) keluasan unit rumah PPR telah ditambahbaik daripada 650kps kepada 700kps bagi unit biasa dan dilengkapi dengan 3 bilik tidur, 2 bilik air, ruang tamu, dapur dan langkan (*yard*);
 - (iii) Elemen kemasan lantai telah ditukar dari jenis lepaan simen (*cement render*) kepada kemasan jubin bagi keseluruhan lantai rumah;
 - (iv) Penambahbaikan dalam kaedah pembinaan dengan penggunaan teknologi *Industrialised Building System* (IBS);
 - (v) rekabentuk bangunan yang dahulunya berbentuk konvensional turut diberi nafas baru kepada jenis moden selain penonjolan imej baru perumahan PPR ini melalui penggunaan skim warna korporat iaitu Merah, Biru dan Putih;
 - (vi) ciri-ciri keselamatan rumah PPR ini juga tidak diabaikan selepas Kementerian mengambil kira kejadian gempa bumi yang berlaku di sesetengah kawasan, maka Kementerian telah memasukkan faktor *SEISMIC* ke dalam rekabentuk

bagi mengurangkan impak gegaran, terutamanya ke atas struktur bangunan;

- (vii) penyediaan kemudahan awam seperti dewan, surau, tadika/taska, taman permainan serta kedai dan gerai yang dibina didalam kawasan PPR;
- (viii) tempat letak kereta bagi rumah berbilang tingkat dengan nisbah 1 unit rumah kepada 1 unit tempat letak kereta serta 20% tempat letak kereta pelawat berbanding PPR terdahulu yang hanya memperuntukkan 1 tempat letak kereta bagi kegunaan 4 unit rumah;
- (ix) sistem penggunaan lif diberi penambahbaikan dengan penggunaan kad akses;
- (x) pemasangan alat perangkap nyamuk solar untuk membendung penyakit-penyakit bawaan nyamuk; dan
- (xi) penghuni PPR juga akan diberi peluang menikmati kemudahan jalur lebar bagi kemudahan internet.

Kementerian Kesejahteraan Bandar,
Perumahan dan Kerajaan Tempatan

Julai 2017